



Kamis, 01 Juni 2023

Ogen: Matuis 19:13-14



Pelepas anak-anak E Reh Ndahi Aku



Anak, em pemere Dibata si mbelin i tengah-tengah keluarga. Jadi sada keriahen kal tupung reh sekalak anak ku tengah jabu. Dolat sekalak bapa ras nande pe tambah, enggo lit penggelarena nande si A entah bapa si A. Adi maba keriahen kal nge ia ku tengah-tengah keluarga, me perlu kal iperdiateken keperluan geluhna? Nina Pdt. Stephentong, adi erkiteken kesibuken pekerjan bapa nande, anak arus ititipken seh la datkenna kekelengen orangtua, orangtua e salah besar/dosa. Pangen ngadi sekalak erdahin gelah anak e iperdiateken asangken duana erdahin, anak e kurang kekelengen. Ergan nge anak asangken erta.

I bas pernanden kalak Jahudi, lit kebiasaan kerna maba anak ku guru agama. Tupung idadap guru agama e takal anakna igejapkenna i je nusur pasu-pasu, sehat mejuah-juah anak e i bas pertumbuhenna. Tupung ibegina Jesus lawes ku daerah Judea, ku lepar lau Jordan idahina Jesus dengen maba anakna gelah idadap Jesus. Sabab ibegina ajar-ajar ndilo Jesus e Guru. Bali akapna Jesus e ras guru agama Jahudi. Bagem mehergana sekalak anak man nande e, ipalarna latih ras ndauh erdalan gelah ipasu-pasu Jesus kal anak e. Amin pe lit si ngambati la ngadikenna erdalan gelah jumpa ras Jesus. Respon Jesus seh kal ulina. Ialo-alona anak e ipelukna, idadapna takalna ras ipasu-pasuna. Nina anak si bage nge si empuna kinirajan surga. Ipandang Jesus ajar-ajar si ngambati anak-anak e reh ndahi IA. I bas mata Jesus pe meherga kal anak-anak e.

Meriah ukurta maka doni enda pe cukup ermediate man anak-anak. Ipedaratna undang-undang perlindungan anak, ras isuratkenna hak-hak anak internasional. Anaka e labo objek tapi subjek, si perlu iergaken, ialoken pendapatna, ia teman ras sahabat man keluarganya. Uga dage kinatana? Enggo dagi siperjuangken hak-hak anak i bas tengah jabunta? Enggo dagi sibereken waktunta alu rutin ercakap-cakap ras ia? Enggo dage sibere kesempatan man bana muat keputusan kerna sura-surana? Enggo dage siperdiateken pertumbuhan kinitekenna? Anak e tuhu meherga, marilah sibabai ia ku Tuhan ulu kegeluhenna. Seh maka tupung ia anak-anak pe banci jadi pasu-pasu ku sekelewetna.